

四庫全書

史部

欽定四庫全書

史部

欽定歷代職官表卷二十三

四

編修臣謝振定覆勘

纂修兼校勘內閣中書臣沈叔埏

膳錄舉人臣阮鍾環

檢

外
七

討

庶常館教習

庶

吉

士

著
士
作
中

松
村
官

野
足
館
松

松
村

檢
習
庶
常

士

庶
常

館
二
部

作
即

檢
習
庶
常
士

詔	待	目	孔	簿	典
---	---	---	---	---	---

次定口車合書

欽定歷代職官表

學士院
科給

紹興

翰林
目

翰林院	翰林院
吏部	吏部

翰林院
孔目

翰林院
侍讀

翰林院

國朝官制

翰林院掌院學士兼禮部侍郎滿洲漢人各一人

初制正五

品以兼禮部侍郎銜為正三品後與內閣學士俱升為從二品

侍讀學士滿洲漢人各

三人

初制從五品雍正三年定為從四品侍講學士同

侍講學士滿洲漢人各

三人

掌

國史圖籍制誥文章之事凡

南書房侍直

尚書房教讀自讀講學士以下咸得預選祭告

郊

廟神祇則擬上祝文恭上

徽號

冊立

冊封則擬上

冊文寶文内外文武官碑文祭文皆撰詞以

進而行之修輯諸書則以掌院學士充總裁官讀講學士以下充纂修官其直省考官及提督學政磨勘鄉會試卷凡翰林官皆預焉

國初設文館於

盛京天聰十年改建內三院順治元年設翰林院置漢人掌院學士一人侍讀學士侍講學士各一人二年省併內三院十五年復設如元年制增置滿洲掌院學士一人漢人侍讀侍講學士各二人十

八年仍省入內三院康熙九年始定設翰林院增
置滿洲侍讀侍講學士各三人二十八年五月以
大學士徐元文兼管翰林院掌院學士事始用重
臣兼領自乾隆元年以來皆以大學士及尚書侍郎
特簡兼攝以重其任其學士員額不別加除授凡滿洲
讀講學士侍讀侍講等缺用各部應升科目出身
之郎中等官一人庶吉士出身之翰林官一人分
班遞補漢人則皆由編修檢討序陞焉

侍讀滿洲漢人各三人

初制正六品雍正三年定為從五品侍講同

侍講滿

洲漢人各三人修撰編修檢討無定員

修撰從六品編修正七品檢討

從七品

掌撰述編輯倬直

經幄順治元年置漢人侍讀侍講各二人十五年各

增置一人康熙九年增置滿洲侍讀侍講各三人

修撰以授第一甲第一名進士編修以授第一甲

第二第三名及第二甲進士檢討以授三甲進士

皆以庶吉士散館者充之其試博學鴻詞科入式
及奉

特旨改館職者亦間得除授不為定額

庶常館教習大臣滿洲漢人各一人小教習翰林官六
人庶吉士無定員

凡每科

殿試傳臚後集諸進士於

保和殿試以論詔奏議詩賦錄其佳者進

御掌院學士乃以諸進士引

見蒙

擢者改為庶吉士入館分清漢書肄業不任以事吏部
疏請

簡用大臣二人掌教習事月考其學業而成就之以侍
讀侍講以下學優品端者分司訓課比三年期滿
教習大臣疏請散館試以詩賦

上親定甲乙越日引

見留館者授職餘以主事知縣用有差

國初教習多以內院學士為之侍讀等亦間有預者
自康熙九年後皆以掌院學士領其事而內閣學
士時參用焉六十一年辛丑科始以工部尚書陳
元龍領教習事嗣後尚書侍郎之不兼院事者均
得為之皆由

特簡無常制小教習始置於康熙三十三年雍正八年
停罷乾隆十年復置如庚戌以前定例皆教習大

臣會同掌院學士掄選

奏充焉

典簿廳典簿滿洲漢人各一人

從八品

孔目滿洲漢人各

一人

從九品

待詔廳待詔滿洲漢人各一人

從九品

典簿掌出納文移孔目掌收貯圖籍待詔掌校對
章疏文史順治元年置漢人典簿孔目十五年復
增置滿洲漢人待詔及滿洲典簿孔目

筆帖式滿洲四十人漢軍四人

初制滿洲四十八人漢軍八人康熙三十四年省

滿洲八人漢軍四人

職事具吏部篇

謹案翰林院不設司屬凡有陳奏及往來文牒
舊例以典簿筆帖式具稿呈堂雍正元年以官
輕滋弊令掌院學士於俸淺編修檢討內擇才
守優長者滿洲漢人各二人充作司官名曰辦
院事後復增置協辦院事二人由掌院學士掄
充有闕遞補以非院官正額故不入於表謹附

識於此

歷代建置

謹案翰林院為儒臣華選前代為是官者多視
朝廷簡用而未嘗設為定制自漢以來或在內
省或在外司或為專職或為兼領其建置紛殊
名號同異未可僕數世之綴述舊聞者以其均
有文翰尚司一槩徵引以為詞林故事而詳考
其實與今之翰林院固有未能一一相準者蓋

嘗折衷而權論之自古文學之任為儒臣典領者曰制誥曰國史曰撰輯曰書籍大約不外此數端而又有侍從左右以備顧問者則並無定制綜其大槩如周之左右史及漢東觀唐宋史館之類為國史之任歷代著作為撰輯之任漢魏以來秘書及唐宋昭文集賢之類為書籍之任皆有省署員額為職事官如漢之侍詔金馬門諸吏文學及宋總明觀梁壽光殿陳西省北

齊文林館後周麟趾殿之類則即所謂侍從左右者皆用他官入直而未嘗置為定職若夫翰林之名則其初專為制誥而設蓋自周官內史掌策命外史掌外令已為珥筆權輿漢魏以來職在尚書中書至唐特建翰林院於禁中置學士以專司內命而翰林之官始重沿襲至今稱為華選然唐宋所謂翰林學士者其職在於叅受密命發演絲綸乃如今軍機大臣之承

金
卷二十三
青書宣而於他事固無所預故其時國史著作之官
仍以文史著述各守職司別為一署不相統攝
自明代改定官制舉歷代所為國史著作之屬
悉廢不置獨併其所掌於翰林院於是翰林遂
為職事官雖沿用唐宋學士院舊名其實即歷
代國史著作之任與唐宋之典內庭書詔者迥
不相同矣我

朝稽古建官斟酌盡善

國初翰林與內閣通為內三院其後改設專署而凡

詔冊詞命之事尚多由院撰擬雖其事皆唐宋中書所行之外制與學士院內命稍殊而典誥司存實與翰林本制相合至侍從禁近自康熙十六年始

命侍講學士張英等八直

南書房嗣後供奉筆墨者率由詞臣掄選即

擢至卿貳亦稱

內廷翰林實為西清專職蓋如古侍中待詔之比而

恩遇倍優謹採撫崖畧與史館著作省諸官同加考覈著之於表以徵沿革至秘書職司典籍前代以為儒臣貼職僅屬虛名今則

冊府宏開瑯環萃美鼎建

崇閣縹帙充盈初置官僚用專職守文治之盛亘

古無儔故秘書監三館諸官悉別繫之

文淵閣諸閣職表內以待其實而說書進講及起

居郎舍諸職則又別以

經筵

日講

起居注官合為一表次之於後俾儒官職事異同分

合開卷釐然永昭

右文之盛軌焉

三代

孔穎達春秋正義禮記內則稱五帝有史官吳華
覈曰五帝三王皆立史官

後漢書班彪傳唐虞三代詩書所及世有史官以
司典籍

周禮春官內史中大夫一人下大夫二人上士四
人中士八人下士十有六人府四人史八人胥四
人徒四十人掌王之八枋之灋以詔王治凡命諸

侯及孤卿大夫則策命之凡四方之事書內史讀

之王制祿則贊為之以方出之內史掌書王命遂

貳之

鄭康成注贊為之為之辭也以方出之以方版書而出之賈公彥疏王有詔敕則副寫一

通藏之以侍校勘也

外史上士四人中士八人下士十有六

人胥二人徒二十人掌書外令掌四方之志掌三

皇五帝之書掌達書名於四方若以書使于四方

則書其令

鄭康成注外令王命下畿外志記也謂若魯之春秋晉之乘楚之檮杌三皇五

帝之書左傳所

謂三墳五典

謹按王子年拾遺記稱黃帝置四史以主圖籍
其後代有史官俾領典冊之任今翰林院專掌
文翰其源實本於此然世稱翰林官為太史則
稽之古制殊未盡然蓋周官五史雖以太史為
之長而其職專在稽天道以建典則與司記載
者全不相符故漢魏以來其名專屬之日官而
詞臣珥筆者未嘗沿以為號惟內史掌策命外
史掌外令及書志即如後世制誥書籍皆為今

翰林院之一職故互見於此表焉

內史又見內閣
外史又

見文淵閣
閣職篇

秦

謹按冊府元龜稱戰國之世咸有史官秦并天下有太史令胡毋敬之然秦之太史令自掌天文並非秉筆之任唐六典稱周末凌替史官放絕秦滅先王之典其制莫存者是也今故不著於表

漢

漢書嚴助傳武帝擢助為中大夫後得朱買臣虞
邱壽王司馬相如主父偃徐樂嚴安東方朔枚臯
膠倉終軍嚴蔥奇等並在左右助為會稽太守上
書願奉三年計最因留侍中有奇異輒使為文及
作賦頌數十篇

漢書東方朔傳朔待詔公車久之使待詔金馬門
稍得親近以為常侍郎

漢書枚乘傳乘子臯上書自陳帝召入見待詔拜
為郎從行離宮館臨山澤弋獵上有所感輒使賦
之

漢書王褒傳宣帝時修武帝故事講論六藝羣書
召高材劉向張子儒華龍柳褒等待詔金馬門

漢書蕭望之傳周堪白令鄭朋待詔金馬門

謹按漢時翰林未有專官而武帝令賢良文學
待詔金馬門應制奏賦即馬端臨所謂以言語

文字被顧問者蓋如今

內廷翰林之職也至西漢太史令屬太常乃術數之官不司著述故司馬遷亦自稱近於卜祝之間其所著書大抵私家撰述並無纂輯之職實與今翰林官不同故別系之欽天監篇不著於此表

漢書西域傳諸大夫郎為文學者顏師古注為文學謂學經書之人

漢書霍光傳諸吏文學光祿大夫臣遷太中大夫
臣德等

謹按漢制諸吏為加官所加或列侯將軍卿大
夫將都尉郎中無員漢儀注謂諸吏給事中日
上朝謁平尚書奏事分為左右曹其職最稱親
近諸吏文學者蓋以文學之臣選為諸吏正如
今翰林官之入直

內廷者耳至當時如嚴助朱買臣為中大夫虞邱

壽王為中郎主父偃徐樂嚴安為郎中皆以文章經術侍從左右蓋即西域傳所稱諸大夫郎為文學者也

徐堅初學記東漢圖籍在東觀名儒碩學多著作東觀然皆他官假著作之名而未立著作之官

後漢書延篤傳篤以博士徵拜議郎與朱穆邊韶共著作東觀

後漢書盧植傳植徵拜議郎與諫議大夫馬日磾

議郎蔡邕楊彪韓說等並在東觀續漢記

謹按後漢東觀典司著述即今翰林之職然不
置省署僚屬僅以他官兼之而已至學士之名
舊說以為始於漢之鴻都門然考後漢書靈帝
開鴻都門學召諸生之能為尺牘詞賦及工書
鳥篆者處其中故靈帝紀有光和九年始置鴻
都門學生之文蓋指鴻都諸生而言非學士
也

馬端臨文獻通考漢張酺侍講御前有號無名
方以智通雅漢有講郎侍講所自也章帝詔高才
生雖不立學官然皆擢高第為講郎張輔子蕃以
郎侍講趙典拜議郎侍講禁內此其端矣

謹按侍講之名起於東漢范書所載如劉寬郅
憚胡憲桓郁桓彬楊賜黃瓊荀悅孔融等或侍
講殿中或侍講禁中或侍講華光殿不可殫數
然皆以他官兼領未為員額也

三國

冊府元龜蜀有王崇補東觀令

三國蜀志許慈傳先主定蜀鳩合典籍許慈胡潜並為學士與孟光來敏等典掌舊文

三國魏志明帝本紀青龍四年夏四月置崇文觀徵善屬文者以充之

三國魏志王肅傳肅領秘書監兼崇文觀祭酒

冊府元龜魏明帝太和中詔置著作郎一人佐郎

一人竝隸中書省專掌國史亦有他官兼領衛觀
以待中充著作是也其後增佐郎為三人

三國魏志三少帝紀正始四年講尚書經通賜侍
講者有差

三國吳志薛瑩傳瑩徙廣州還為左國史華覈傳
遷東觀令領右國史韋曜傳諸葛恪表曜為太史
令撰吳書孫休踐阼欲延曜侍講張布不可常領
左國史

謹按蜀志始有學士之名然並非官號

說見後魏

吳皆有侍講亦沿後漢之制為他官兼領惟著作郎始置於魏太和中即今翰林之任崇文觀並掌文史而王肅為之祭酒則又如今掌院學士之任也

晉

晉書職官志晉受命武帝以繆徵為中書著作郎元康二年詔曰著作舊屬中書而秘書既典文籍

今改中書著作為秘書著作郎於是改隸秘書省
後別自置省而猶隸秘書著作郎一人謂之大著
作專掌史任又置佐著作郎八人著作郎始到職
必撰名臣傳一人

文獻通考晉著作郎進賢兩梁冠介憤絳朝服
晉書元帝本紀建武元年十一月置史官

謹按晉之大著作專總史任蓋如今掌院學士
之職而考之晉書如張載以中書侍郎領著作

張亢孫綽俱以散騎常侍領著作則亦多以他
官兼領不必正除也

宋齊梁陳

宋書百官志著作郎一人佐郎八人掌國史

南史宋明帝本紀泰始六年九月立總明觀徵學
士以充之置東觀祭酒訪舉各一人學士二十人
分為儒道文史陰陽五部

謹按學士之名始見於三國蜀志至劉宋又有

總明觀學士之稱其後若梁士林陳西省周麟趾之類皆置學士唐宋之翰林學士其權輿蓋本於此然以史傳詳悉叅覈則漢魏而後所謂學士者猶云有文學之士耳並非官號也漢書石顯傳顯恐天下學士姍已三國志秦宓傳張溫問宓何人諸葛亮曰益州學士也來敏傳以耆儒學士見禮於世其所稱學士皆不過推崇學術之詞故南北朝之言學士者如南齊書竟

陵王子良傳集學士抄五經百家為四部要畧
梁書劉峻傳竟陵王招學士何允傳允撰新禮
置學士二十人佐允撰錄魏書江式傳式求撰
集古今文字并學士五人助臣披覽李修傳諸
學士及工書者百餘人撰諸藥方隋書柳詵傳
引才學之士百餘人以充學士後周書蕭大圜
傳開麟趾殿招集學士大圜預焉而隋百官志
又稱儒林文林二郎皆上在藩以來直司學士

據此則所云學士者乃拍選擇才學之人以資
訪問預編輯如今纂修供奉之比原不以為分
職之正名即唐初秦王府諸學士猶同斯例自
景龍中置大學士學士直學士諸名始有員額
元宗因置翰林學士設學士院以居之於是學
士始以入銜為儒臣一定之官秩矣

杜佑通典著作郎著作佐郎齊與晉同

冊府元龜齊太祖建元二年初置史官以散騎常

侍禮超記室江淹掌史職

隋書百官志梁置著作郎一人佐郎八人掌國史
著作郎謂之大著作梁初周捨裴子野皆以他官
領之又有撰史學士亦知史書

南史張率傳率直文德待詔省俄直壽光省陸雲
公傳召為尚書儀曹郎入直壽光省

通雅蕭梁有壽光殿學士之號殿學之名始此

陳書虞荔傳梁武帝置士林館用荔為士林學士

顏之推集梁元帝在江陵詔直省學士王珪戴陵
比校秘閣舊書

陳書陸瓊傳轉中庶子領大著作撰國史遷吏部
尚書著作如故

陳書高祖本紀永定三年詔依前代置西省學士
兼以伎術者預焉

冊府元龜自齊梁至陳著作佐郎多為令僕子起
家之選

謹按宋齊以後著作郎亦多以他官兼領南史
所載如徐廣以散騎常侍何承天以率更令劉
杳以步兵校尉褚球以秘書監皆領著作蓋以
國史事鉅故特重其任耳又按吳曾能改齊漫
錄引陶宏景傳以為侍讀起於梁然考宏景為
齊高帝引為諸王侍讀而梁書到洽傳亦稱洽
為太子舍人俄為侍讀侍讀省仍置學士二人
洽充其選是齊梁侍讀乃東宮及王邸之官其

名雖初見於此而實非今翰林侍讀之權輿也

北魏

文獻通考後魏有著作郎佐郎

魏書高允傳允為中書侍郎以本官領著作郎崔

光傳轉著作郎參撰國書遷中書監以黃門侍郎

孫惠蔚代光領著作無所厝意於是詔光還領著

作正光二年光為司徒著作如故韓興宗傳為祕

書郎參著作事

魏書韓子熙傳天平初為侍讀興和中孝靜欲行
釋奠勅子熙為侍講

北齊書崔陵傳魏天平中為侍讀封隆之傳天平
初魏靜帝詔為侍講

司馬光資治通鑑魏著作令史閔湛

謹按侍讀與侍講並置實始於魏之天平中高
承事物記原以侍讀為始於唐明皇時者亦非

也

北齊

隋書百官志後齊著作省郎二人佐郎八人校書

郎二人

北齊書魏收傳轉秘書監乃兼著作郎杜臺卿傳
歷中書黃門侍郎兼大著作修國史

唐六典齊有文林館學士掌著述

隋書李德林傳齊主留情文雅召入文林館令與

黃門侍郎顏之推二人同判文林館事

謹按顏之推傳稱齊文林館所進文章皆封署
於進賢門奏之待報方出是所掌為文章供奉
之事蓋猶今之

內廷翰林也

後周

通典後周官品正五命春官內史中大夫正四命
春官外史下大夫正三命春官著作上士正二命

春官著作中士

文獻通考後周著作上士中士掌綴國錄屬春官之外史

唐六典後周有麟趾殿學士掌著述

後周書明帝本紀常集公卿已下有文學者八十餘人於麟趾殿刊校經史

隋

隋書百官志著作曹置郎二人佐郎八人校書郎

正字各二人煬帝即位增著作郎階為正五品又降為從五品

唐六典自晉以來著作皆有令史史闕其員品

唐

舊唐書職官志著作局

龍朔為司文局

著作郎二人

從五品上

龍朔為司文郎中咸亨復也

佐郎四人

從六品上

校書郎二人

正九品上

正字二人

正九品下

楷書手五人掌固四人著作郎佐

郎掌修撰碑志祝文祭文與佐郎分判局事

通典唐武德初史官屬著作局至貞觀三年移史館於門下省北宰相監修自是著作郎始罷史職其修撰史事以他官兼領或卑品而有才者亦直焉開元二十五年移於中書省北

冊府元龜憲宗元和四年令登朝官入史館者並為修撰不過三員非登朝者並為直館

謹按魏晉而後著作皆兼修起居注自後周置外史下大夫以書言動其後分為門下省之職

而著作遂專撰國錄蓋如今翰林院之又有

起居注衙門也唐以前史官皆屬著作唐初始移門下省後又改屬中書蓋如今之別置

國史館設總裁纂修以內閣官提調而不屬於翰林院也

李肇翰林志唐初有中書舍人專掌詔誥雖曰禁省猶非密切故溫大雅魏徵等時召草制未有名號乾封已後始曰北門學士元宗初改為翰林待

詔又改為翰林供奉開元二十六年劉光謙張洎
為學士始別建學士院於翰林院之南已後翰林
始兼學士之名凡學士無定員皆以他官充下自
校書郎上及諸曹尚書皆為之元和以後院長一
人別勅承旨或密受顧問獨召對敷居北壁之東
閣號為承旨閣子駕在大內即於明福門置院駕
在興慶宮則於金明門內置院今在右銀臺門之
北第一門榜曰翰林之門入門直西為學士院北

廳西舍之南有二間貯遠歲詔草又北回而東並待詔居之又東盡至於東垣為典主堂待詔之職執筆硯以俟書寫多至五六員其選以能不以地故未嘗用士人時以居翰苑者皆謂凌玉清邈紫霄豈止於登瀛洲哉亦曰玉署玉堂焉

新唐書百官志翰林院者待詔之所也唐制乘輿所在必有文詞經學之士下至卜醫伎術之流皆直別院以備宴見元宗初置翰林待詔掌四方表

疏批答應和文章既而又以中書務劇文書多壅滯乃選文學之士號翰林供奉與集賢學士分掌制詔書敕開元二十六年又改為學士別置學士院專掌內命凡拜免將相號令征伐皆用白麻其後選用益重而禮遇益親至號為內相

胡三省通鑑注唐置翰林學士之始無承旨承旨元并上始命鄭絪為承旨大誥令大廢置丞相之密畫中外之密奏上之所甚注意者莫不專受專

對

謹按自揚雄有翰林主人之稱其後李充有翰林論鍾嶸稱郭璞為翰林詩皆文苑用相標目而已即唐初置翰林院亦不過內廷供奉之所並不繫於職司自元宗置學士院後遂兼翰林之名稱為翰林學士今之翰林官制實肇見於此然其時皆以他官選充侍直禁廷不為省署無可隸屬故唐百官志通典皆闕而不載而文

章史冊之事則仍掌之著作史館諸官翰林惟
司內命其他並無所預由五季迄宋猶然金元
二代翰林始不專制詔然其官猶屬內廷至明
因設翰林院為外諸司盡移前代秘書著作之
職以歸之而制詔別屬之內閣由是翰林之名
雖存其實已與唐宋不同矣特明制以大學士
統翰林院而入閣辦事者亦必由翰林官選用
則職掌相通其由來固有所自耳

文獻通考唐元宗開元三年始命馬懷素褚無量
更日侍讀十三年置集賢院侍讀學士侍讀直學
士

章俊卿山堂考索唐以令狐德棻請修近代史遂
命修撰名始於此

唐六典集賢殿侍講學士開元初康子元等為之
修撰官同直學士無常員以他官兼之又有留院
官檢討官皆以學術別敕留之

謹按今侍讀侍講學士及修撰檢討官名皆權
輿於此惟當時多以他官兼之不為定闕與今
制為不同耳

五季

五代史李愚傳李延光以經術事梁末帝為侍講
李琪傳除右散騎常侍侍講

五代史賈緯傳改起居郎史館修撰預修唐書

五代史孫晟傳莊宗以晟為著作佐郎

謹按五季設官多闕畧無考然既有著作佐郎則著作局固尚沿唐制矣至侍講修撰之名頗雜見於史蓋亦以他官兼銜未為額闕也

五代史姚顗傳末帝時為翰林學士鄭珏傳累拜中書舍人翰林學士奉旨

五代會要後唐同光元年四月置護鑒書制學士以尚書倉部員外郎趙鳳為之時莊宗初建號故特立此名非故事也

富大用事文類聚後唐明宗天成八年敕翰林學士入院必以先後為定惟承旨一員出自朕意不計官資先後在學士之上

五代史桑維翰傳天福五年詔廢翰林學士按唐六典歸其職於中書舍人而端明殿學士樞密院學士皆廢及維翰為樞密使復奏置學士而悉用親舊為之

謹按翰林學士承旨至五季而其任益重當如

今掌院學士之比其鄭珏傳又稱為奉旨者蓋
梁諱誠字故以嫌名改承為奉也

宋

宋史職官志國史實錄院提舉國史監修國史提
舉實錄院修國史同修國史史館修撰同修撰實
錄院修撰同修撰直史館編修官檢討官校勘檢
閱校正編校官

文獻通考宋制監修國史一人以宰相為之修撰

直館檢討無常員修撰以朝官充直館檢討以京官以上充

山堂考索仁宗慶歷四年史館王洙承旨單士寧編修例冊編修之名自此始紹興中以修正史置編修二人又祥符中高緯為史館修撰淳化中郭延澤董元亨為史館檢討

謹按宋之國史實錄院雖別為一所而不在諸省寺監之例蓋如今

國史館之比故監修國史即如今之總裁官修撰
編修檢討即如今之纂修官本應以他職兼領
然考之於史如曾鞏李燾洪邁等皆嘗專為史
館修撰則後之置為定闕者實已昉於宋世而
編修檢討等至今猶稱為史官其源亦本於此
也

文獻通考日歷所隸秘書省著作佐郎掌以宰相
時政記左右史起居注所書會集修撰為一代之

典舊於門下省置編修院專掌國史實錄修纂日
厯官制行屬秘書省國史案初除林希為大著豐
稷為小著皆一時選

謹按宋著作郎初為寄祿官元豐正官制以掌
日厯所事則仍為史官故與國史院分併不一
員額亦廢置無常其實與史館之修撰檢討並
無二職也

宋史職官志翰林學士院翰林學士承旨翰林學

士知制誥直學士院翰林權直學士院權直掌制
誥詔令撰述之事

山堂考索宋翰林學士掌內制凡制誥赦救國書
及宮禁所用之文詞凡后妃親王公主宰相節度
使除拜則學士草詞授待詔書訖以進赦降德音
則先進草大詔命及外國書則具本稟奏傳書亦
如之凡他官入院未除學士謂之直院學士俱闕
他官暫行文書謂之權直

李心傳建炎以來朝野雜記直學士院自開寶二年盧丞相多遜始權直學士院自開寶六年張舍人澹始翰林權直自乾道九年崔舍人敦詩始學士院權直自淳熙五年崔舍人敦詩始

文獻通考宋太宗始用著作佐郎呂文仲為侍讀其後馮元為翰林侍讀又有馬宗元為侍講高若訥為侍讀不加別名但供職而已

葉夢得石林燕語咸平中以侍讀侍講班秩未崇

乃命楊徽之為侍讀學士邢昺為侍講學士班翰
林學士下講讀置學士自此始慶厯後凡自翰林
學士出例換侍讀學士遂為故事

建炎以來朝野雜記翰林讀講學士真宗朝始置
元豐官制去翰林字及學士名元祐中復之

沈括夢溪筆談唐翰林院在禁中乃人主燕居之
所應供奉之人自學士以下工伎羣官司隸籍其
間者皆稱翰林如今之翰林醫官翰林待詔之類

是也唐制自宰相而下初命皆無宣召之禮惟學士宣召蓋學士院在禁中非內臣宣召無因得入故院門別設複門亦以其通禁庭也至如挽鈴故事亦緣其在禁中雖學士院吏亦止於玉堂門外則其嚴密可知如今學士院在外與諸司無異亦設鈴索悉皆文具故事而已

江少虞宋朝事實類苑學士院在資福殿橫街之南宣徽院北玉堂上東閣承旨學士居之西閣第

二廳居之玉堂後東西二閣第三廳而下分處之
待詔房六間在玉堂西南孔目院在西謂之西頭
驅使院在東謂之東頭

謹按魏泰東軒筆錄稱宋朝翰林學士不領他
局真宗時始有判他局者及元豐改官制而學
士仍罷主判之制是宋世翰林學士實為正闕
故宋史職官志已別為一條與唐制稍有不同
至其時學士所掌考之諸書則自草詔令書敕

以外凡有御詩多宣令屬和如聲韻奇險難以
賡載者必拜章滙懇陳述寡和之意往往優詔

得免

見宋朝
事始

故王禹偁小畜集有謝免和御製

詩表其職最為榮近宜太宗詔書有典司綸誥
親近冕旒之語也又宋世翰林讀講學士雖得
以翰林繫銜其實乃入侍經筵之官並不於學
士院供職故元豐時嘗去翰林之名然翰苑經
筵同為儒臣之榮選所掌相通固亦不必區為

二職耳

洪邁容齋隨筆宋朝館閣之選皆天下英俊必試而後命一經此職遂為名流其高者曰集賢殿修撰史館修撰直龍圖閣直昭文館史館集賢院秘閣次曰集賢秘閣校理官卑者曰館閣校勘史館檢討均謂之館職記注官缺必於此取之非經修注未有直除知制誥者中外皆稱為學士及元豐官制行凡帶職者皆遷一官而罷之而置秘書省

金史卷之二十一
大抵與職事官等反為留滯矣

謹按今翰林之稱館閣其名蓋起於宋時所謂
館者乃指昭文史館集賢三館而言所謂閣者
乃指秘閣龍圖諸閣而言皆掌圖籍文史之事
而翰林學士院專司內命其職判然不同故當
時或曰翰苑或曰禁林並不稱館閣自明制以
圖籍文史移之翰林院於是翰林始有館閣之
目矣然明代雖有此稱而並無其地於名實仍

不相副

本朝規制周詳庶常有館

國史有館於館職之名固已脗合近又鼎建

文淵閣藏度四庫全書

特詔設閣職以司排校視宋之秘閣尤極崇嚴今

按其職守取史館諸官載之此表而以秘閣諸

官分繫之

文淵閣閣職表內用符其實云

又按宋學士職名至多樞密直學士以隸直樞
密院資政觀文大學士以寵宰相舊臣端明資
政殿及天章龍圖等閣學士以為從官及外除
者兼銜並無常職今故並附識於此不列諸表
云

遼

遼史百官志北面官大林牙院掌文翰之事○北
面都林牙○北面林牙承旨○北面林牙○左林

牙○右林牙○南面官翰林院掌天下文翰之事
○翰林都林牙興宗重熙十三年有翰林都林牙
○南面林牙聖宗統和初有南面林牙○翰林學
士承旨趙延壽傳見翰林學士承旨張礪○翰林
學士太宗大同元年見和凝為翰林學士○翰林
祭酒韓德崇景宗保寧初為翰林祭酒○知制誥
室昉太宗入汴詔知制誥○國史院○監修國史
聖宗統和九年見監修國史室昉○史館學士景

宗保寧八年見史館學士○史館修撰劉輝大安
初為史館修撰○修國史耶律玘重熙初修國
史

謹案唐宋學士雖有翰林之名然署銜猶兼稱
翰林學士院其去學士而直稱翰林院者實自
遼始又遼代尚有宣政殿觀書殿諸學士其職
掌不見於史當亦如宋之雜學士以為加銜並
不司文翰之事也

金

金史百官志國史院監修國史掌監修國史事修

國史掌修國史判院事同修國史二員

女直人漢人各一員

承安四年更擬女直一員罷契丹同修國史

編修官正八品女直漢人

各四員

明昌二年罷契丹編修之員添女直一員大定十八年用書寫出職人

檢閱

官從九品

書寫女直漢人各五人

翰林學士院

天德二年命翰林學

士院自侍讀學士至應奉文字通設漢人十員女直契丹各七員

翰林學士承旨

正三品掌制撰詞命凡應奉文字銜內帶知制誥

直學士
以上同

貞祐三年陞從二品翰林學士正三品翰

林侍讀學士從三品翰林侍講學士從三品翰林
直學士從四品不限員翰林待制正五品不限員
分掌詞命文字分判院事銜內帶知制誥翰林修
撰從六品不限員掌與待制同應奉翰林文字從
七品

謹案歷代國史學士院官皆以他職兼領宋翰
林學士雖有正闕而猶帶他銜金則國史院編

修及翰林各官皆定以品級於是詞臣遂設為專職無復兼銜之例矣至修撰本史館職名其翰林之有修撰亦自金始也

元

元史百官志翰林兼國史院秩正二品中統初以王鶚為翰林學士未立官署至元元年始置秩正三品六年置學士二員侍讀學士二員侍講學士二員直學士二員八年陞從二品十六年增侍讀

學士一員二十年省併集賢院為翰林國史集賢
院二十一年增學士二員二十二年復分立集賢
院二十三年增侍講學士一員大德九年改典簿
為司直置都事一員皇慶元年改司直為經歷延
祐五年後定置承旨六員從一品學士二員正二
品侍讀侍講學士各二員從二品直學士二員從
三品屬官待制五員正五品修撰三員從六品應
奉翰林文字五員從七品編修官十員正八品檢

閱四員正八品典籍二員正八品經歷一員從五
品都事一員從七品掾史四人譯史通事知印各
二人蒙古書寫五人書寫十人接手書寫十人典
吏三人典書二人○蒙古翰林院秩從二品掌譯
寫一切文字及頒降璽書並用蒙古新字仍各以
其國字副之至元八年始立新字學士于國史院
十二年別立翰林院置直學士一員待制二員修
撰一員應奉四員令史一人知印一人十八年增

學士三員省漢兒令史置蒙古筆且齊

解見戶部篇四

人二十九年增侍讀學士一員知印一人三十年
增管勾一員大德五年陞正二品九年置司直一
員都事一員皇慶元年改陞從一品設官二十有
八吏屬二十有四延祐二年改司直為經歷後定
置學士二員讀講學士各二員直學士二員待制
四員修撰二員應奉五員經歷一員都事一員品
秩並同翰林國史院承發架閣庫管勾一員正九

品筆且脅一十四人掾史三人譯史一人知印二人書寫一人典史三人

謹案元代又有奎章閣學士院文宗天歷二年置有大學士侍書學士承制學士供奉學士等員掌進經史之書考帝王之治順帝至元六年罷更立宣文閣不置學士惟授經郎及監書博士以宣文閣繫銜又有藝文監亦天歷二年置專以國語敷譯儒書有大監少監監丞等員至

元六年改為崇文監令翰林國史院領之以職制相準奎章閣蓋如今之

內廷翰林藝文監則即今繙書房之任以非翰林院沿革所繫謹附識於此不列諸表

明

明會典明初置翰林院為正三品衙門設學士侍講學士侍讀學士直學士典簿待制修撰應奉編修典籍檢閱等官

明史職官志翰林院學士一人

正五品

侍讀學士侍

講學士各二人

並從五品

侍讀侍講各二人

並正六品

典籍

二人

從八品

侍書二人

正九品後不常設

待詔六人

從九品不常設

孔目一人

未入流

史官修撰

從六品

編修

正七品

檢討

從七品

品庶吉士無定員學士掌制誥史冊文翰之事以

考議制度詳正文書備天子顧問侍讀侍講掌講
讀經史史官掌修國史庶吉士讀書翰林院以學
士一人教習之侍書掌以六書供侍待詔掌應對

孔目掌文移吳元年初置翰林院秩正三品設學士侍講學士直學士修撰典簿編修洪武二年置學士承旨正三品改學士從三品增設待制應奉典籍等官十三年增設檢閱十四年定學士為正五品革承旨直學士待制應奉檢閱典簿設孔目博士侍書待詔檢討令編修檢討典籍同左春坊左司直郎正字贊讀考駁諸司奏啟平允則署其銜曰翰林院兼平駁諸司文章事某官某列名書

之十八年更定品員

如前所列未
有庶吉士

以侍讀先侍講

建文時仍設承旨改侍讀侍講兩學士為文學博士設文翰文史二館改孔目為典簿改中書舍人為侍書以隸翰林又設文淵閣待詔等官成祖初復舊其年九月特簡講讀編檢等官參預機務謂之內閣然解縉胡廣等既直文淵閣猶相繼署院事至洪熙以後楊士奇等加至師保禮絕百僚始不復署史官自洪武十四年置修撰三人編修檢

討各四人其後由一甲進士除授及庶吉士留館授職往往溢額無定員嘉靖八年復定講讀修撰各三人編修檢討各六人皆從吏部推補如諸司例然未幾以侍從人少詔采方正有學術者以充其選因改御史胡經員外郎陳東主事唐順之等七人俱為編修以後仍循舊例由庶吉士除授卒無定額崇禎七年又考選推官知縣為編修檢討蓋亦初舉非常制也庶吉士自洪武初有六科庶

吉士十八年以進士在翰林院承敕監等近侍者
俱稱庶吉士永樂二年始定為翰林院庶吉士選
進士文學優等及善書者為之三年試之其留者
二甲授編修三甲授檢討不得留者則為給事中
御史或出為州縣官宣德五年始命學士教習萬
厯以後掌教習者專以吏禮二部侍郎二人

謹案自古儒學之臣或以文章備顧問或以筆
札司紀載莫不簪毫珥管出入承明與他曹之

尚治案牘者較為地近而職清故歷代以來最稱華選冊府元龜以翰林學士等之典司綸誥供奉文章者列為詞臣部以著作郎等之職領筆削任膺纂輯者列為國史部今之翰林官實兼二者而有之然翰林專直禁廷著作列居外省其局尚分至明初設翰林院以綜其事次於部院諸司永樂中置內閣特選翰林官入直以預機務嗣後登綸扉者必起家翰苑其餘遷轉

亦視他曹為優異顧明代資格太拘一與詞林之選便可坐躋華廡往往優游養望散館後率謁假回籍吏部輒按原資起用竟有家居數十年遷至尚書侍郎始行入朝供職者偶有一二調外及改部即衆論喧嘩互相袒徇其甚者每選翰林官入內書堂教小內侍俾得與宦豎交結夤緣藉其輿援視為終南捷徑於國體官常所關尤鉅崇禎間又以行取之知縣推官改授

館職思欲破格求才而卒不能收一日之效
國家詞曹職制視前代益昭明備

皇上親幸翰林院

錫宴賡歌

恩禮隆重置庶常館於正陽門東以為庶吉士講肄
之所

發帑增修廩餼豐渥凡翰詹諸臣屢蒙

御試

親加甲乙學問優贍者每荷破格超除其才堪外用者則或

特詔大臣掄選或以考績

記名出膺道府又定例令掌院學士於

圓明園直班日以編檢十員更番引

見五年一舉以昭慎重裁成造就

恩意周詳芸館羣僚無不奮興感勵玉堂盛軌洵乎

振古為隆爾

又案書有十體曰誥曰命皆教誨臣下之辭蓋
即周官內史所掌策書為後世誥勅所自昉今
存者如君陳君牙諸篇大抵意深勸勵並無所
褒貶於其間至漢而三王賜策其文具載史記
尚為不失古意魏晉以後其事屬之中書省唐
代始設翰林學士以專知制誥而中書舍人分
掌外制迨宋而其職益重號為兩制宣名鎖院
嘖嘖艷稱然當時制草多尚駢儷體涉浮華其

措詞已不能崇實甚至愛憎任情肆口低昂遂以朝廷榮辱大柄付之當制諸臣之手使得假宣麻出告之權以快其報復恩讐之具雖持正如蘇軾而於呂惠卿謫詞猶自誇三十年劖子方剛得一有肉漢其他若鄭畋草劉瞻謫詞多稱其清節而路巖以為何異表薦劉相汪藻草李綱謫詞至比之共驩少正卯而以為我文章自直一翰林學士彼不我與安得不醜詆之其

顛倒黑白如此者不可殫數又其陋者且因交
游請乞利其潤筆為之飾詞取悅終至入主出
奴互相排袒恩怨糾結黨論繁興浸釀清流之
禍其弊有不可勝言者伏讀

御製題董其昌自書告身一篇以制誥之設尚空言
而收實害鮮彰瘴之益成聲氣之私為國家者
何賴有此

聖訓煌煌推闡深切誠萬世之寶鑑也我

朝定制文武各官黜陟祇稱某人補授某官某人

降調革職

誥命

勅命皆視品級大小定有成式文簡辭嚴用彰

明訓其祭文碑文由翰林院撰擬

奏請

欽定詞皆核實不爽銖毫珥筆詞臣斷不能更假公
事以逞其私忿歷代黨援門戶之陋習至今日

而盡行掃除信足永垂法守矣

欽定歷代職官表卷二十三

欽定四庫全書

欽定歷代職官表卷二十四

經筵日講起居注官表

經筵講官

元秦漢後漢三國晉

宋齊梁陳

北魏北齊後周

隋唐

宋遼金

元明

宋史職官表

元史職官表

明史職官表

清史職官表

通志職官表

通志職官表

通志職官表

通志職官表

通志職官表

經筵日講起居注官

國朝官制

經筵講官滿洲漢人各八人

掌進讀講章敷陳典訓以奉侍

經幄敬襄鉅典歲二月八月兩舉

經筵講書滿洲漢人各一人講經滿洲漢人各一人

由翰林院先期請

旨簡派滿洲講官以大學士內閣學士掌院學士讀講

學士詹事少詹事及尚書侍郎左都御史副都御史通政使大理寺卿等官列名漢人講官以大學士內閣學士掌院學士讀講學士詹事少詹事祭酒及尚書侍郎左都御史等官之由翰林升任者列名以原銜兼充員額順治十四年定置日講起居注官滿洲八人漢人十有二人

掌侍直

起居記言記動均翰林詹事坊局官以原銜兼充引

見簡用惟滿漢掌院學士例各兼一缺凡

皇帝御門聽政朝會宴饗大典禮大祭祀及每歲勾決

重囚皆以

日講官滿洲漢人各二人近前侍班

謁

陵

校獵

巡狩方岳則請

旨扈從凡侍直敬聆

綸音退而謹書之具年月日及當直官姓名於籍月成
滿漢文各二帙至次年按月編排彙為總冊封鐫
於匱送內閣尊藏焉初順治十四年始設

日講官十人康熙九年置

起居注館於

太和門西廊設滿洲記注官四人漢人記注官八人

俱以

日講官兼攝十二年增設滿洲記注官一人漢人記
注官二人十六年又增設滿洲記注官一人二十
年增漢人記注官至十八人三十一年定設漢人
記注官十二人五十七年三月省記注官令翰林
官五員於理事日侍班記注之事併歸內閣雍正
元年

詔復設日講起居注官如康熙五十六年以前故事乾隆
元年增設滿洲記注官二人凡滿漢記注官均兼

日講繫銜

起居注館主事滿洲二人漢人一人

掌出納文移校對典籍初置滿洲主事三人漢軍
主事一人康熙三十八年省滿洲漢軍主事各一
人五十七年俱省雍正元年復置滿洲主事二人
十二年增設漢人主事一人

筆帖式滿洲十有四人漢軍二人

順治初置滿洲八人漢軍四人十一年增設滿洲

六人康熙五十七年俱省雍正元年復設如今額

職事具
吏部篇

歷代建置

三代

大戴禮記武王踐阼三日召師尚父而問焉曰黃
帝顓頊之道存乎意亦忽不可得見歟師尚父曰
在丹書王欲聞之則齋矣三日王端冕師尚父亦
端冕奉書而入負屏而立王下堂南面而立師尚

父曰先王之道不北面王行西折而南東面而立
師尚父西面道書之言

謹案大戴禮稱帝入太學承師而問道而學記
亦云太學之禮詔於天子無北面是三代聖王
皆有講學之臣以資啟沃特其官不見於六經
章俊卿山堂考索以周官師氏保氏為後世經
筵之職然師氏保氏雖云王舉則從其實專為
教世子國子而設未可引為原始惟大戴禮武

王踐阼篇載師尚父授丹書頗與經筵之儀相近後世舉經筵不於太學而於殿廷事亦相類錄著於此以徵緣起焉

禮記玉藻動則左史書之言則右史書之鄭康成注其書春秋尚書具存者孔穎達疏左陽陽主動故記動言則右史所書右陰陰主靜故也周禮五史無左右之名襄二十五年太史書崔氏是太史記動為左史也周禮內史掌策命是內史為右史

也

孔叢子古者人君外朝有國史內朝有女史舉則左史書之言則右史書之

謹案左史記動右史記言為後代記注官所由始然其說但見於禮記而周禮則無左右史之名故孔穎達以太史為左史以內史為右史但考太史掌稽天道以建典則並無記載職任不可以當珥筆之官而內史掌八柄以詔王治所

司皆君舉之大者其他策命諸侯卿大夫亦宜
籍記以存盟府則內史當為記事之職而外史
掌外令及四方之令當為記言之職孔穎達据
酒誥鄭注有太史內史掌記言記行之文遂以
二官分配非其實也又考逸周書史記解穆王
時有左史戎夫春秋襄十四年左氏傳有左史
謂魏莊子又楚有左史倚相左史老則是周自
成康以後亦已特置左右史官並不專屬之內

史外史矣

秦

未置

漢

章俊卿山堂考索漢武帝時兒寬語帝經學宣帝
甘露三年詔諸儒講論五經於石渠閣光武平隴
蜀後數引公卿郎將講論經理令桓榮敷奏經義
顯宗時張酺以尚書數講於御前肅宗建初四年
會諸儒於白虎觀講五經同異帝親臨決如石渠

故事

謹案宣帝講石渠章帝議虎觀即講經殿中之
始然特令諸儒講議異同稱制平決而已惟桓
榮張酺之流講經御前此有似於後世經筵日
講之官特未置為定職耳

隋書經籍志漢武帝有禁中起居注

後漢書明德馬皇后本紀后自撰顯宗起居注

杜佑通典漢起居注似在宮中為女史之任

王應麟玉海獻帝及晉代以來起居注皆近侍臣
所錄

謹案隋書稱周穆天子傳體制與今起居注正
同蓋周時內史所記王命之副則記注之設由
來尚矣漢代起居注之名今可考見者漢書兒
寬傳臣瓚注宣帝紀黃龍元年師古注俱引漢
注文選赭白馬賦李善注引漢明帝起居注章
懷太子後漢書註引獻帝起居注而史獨不詳

其珥筆之官杜佑疑為女史之任王應麟亦謂
獻帝以後乃侍臣所錄然考後漢馬嚴傳稱永
平中留仁壽闔與校書郎杜撫班固等雜定建
武注記則當時實以史官掌之又楊賜傳載賜
初侍講華光殿後為太尉去位帝閱錄故事得
賜前侍講注籍云云章懷太子注謂所注之籍
錄據此則亦似今之以

日講起居注合為一職也

三國

三國魏志曹爽傳爽弟彥為散騎常侍侍講

謹案自漢以後歷代俱無經筵日講之官而獨有所謂侍講者以他官兼領掌以經義進講御前蓋即其職但今侍讀侍講已定為翰林官職名故其沿革之詳已專繫之翰林院篇不入於此表

馬端臨文獻通考自魏至晉起居注則著作掌之

其後起居皆近侍之臣錄記也錄其言行與其勲
伐歷代有職而無其官

晉

山堂考索晉起居之職掌於著作其後亦命近臣
主掌其事

謹案隋志載晉起居注卷帙甚多其見於他書
所引者如三國蜀志注引晉泰始起居注魏志
注引陸機惠帝起居注文選注引晉起居注太

康四年詔世說注引惠帝建興太元起居注而
沈約宋書傳亮傳亦引陸士衡起居注稽之陸
機本傳機於惠帝初嘗為著作郎此即當時記
注由著作撰述之一證也

宋齊梁陳

南齊書周顒傳顒兼著作撰起居注

梁書裴子野傳武帝以為著作郎掌修起居注

南史王思遠傳思遠遷為侍中掌優策及起居注

謹案江左諸朝承晉制以著作掌起居注而王思遠乃以侍中亦兼其職南史王喜傳又載有喜為領軍府白衣吏領軍將軍沈演之使寫起居注一事考演之時以中領軍兼侍中則當時起居注實無屬於門下省隋唐起居郎之隸門下其源蓋本於此也

北魏

通典後魏始置起居令史每行幸宴會則在御左

右記錄帝言及宴賓客酬答後又別置修起居注
二人以他官領之

魏書官氏志起居令史從第七品上

謹案北魏修起居注雖他官無之然已設有定
額考之於史如崔鴻以司徒長史前將軍無韋
賁以員外散騎侍郎無許絢以司徒諮議參軍
無陰道方以左民郎中無封肅以太學博士無
邢昕以太尉記室參軍無溫子昇以南主客郎

兼則亦不拘品秩也魏書又有稱監起居者見
於裴修盧聿諸傳有稱典起居注者見於裴伯
茂魏收鄭伯猷諸傳殆即修起居注之職而變
其文者歟

壯齊

隋書百官志後齊集書省又領起居省散騎常侍
通直散騎常侍散騎侍郎通直散騎侍郎各一人
校書郎二人

謹案北齊別置起居省而記言動者始各為一局即如今之設記注館也然考北齊書崔悛傳天保初悛除侍中監起居崔瞻傳瞻為中舍人兼中正員郎勅修起居注則其時撰述之事仍以他官兼之所謂散騎常侍等蓋特具員而已

後周

通典後周官品正四命春官外史下大夫

唐六典後周春官府置外史掌書言及動作以為

國志又有著作掌綴國錄蓋起居著作自此分也
謹案後周既分起居著作為二職則外史當專
記言記動之任然考隋書劉行本傳稱周武帝
親總萬幾行本轉御正中士無領起居注是當
時亦以他官無領不盡屬之外史矣

隋

鄭樵通志隋初以吏部散官及校書正字有敘述
之才者掌起居注職以納言統之至煬帝以為古

有內史外史今著作如外史矣宜置起居注官以掌其內乃於內史省置起居舍人二員次內史舍人下

唐六典漢晉以後起居注皆史官所錄自隋置為職員列為侍臣專掌其事每季為卷送付史官

唐

王圜續文獻通考唐穆宗召韋處厚路隋為侍讀命講書

謹案歷代經筵皆無專官至唐始有內殿侍讀
講書之制然亦未有經筵之名故侍讀侍講諸
官皆別繫諸翰林院篇不列於此

通典唐貞觀二年省起居舍人移其職於門下置
起居郎二人顯慶中復於中書省置起居舍人遂

與起居郎分掌左右龍朔三年改為左右史

郎為左史

舍人為右史

咸亨元年復舊天授元年又為左右史神

龍初復舊

新唐書百官志門下省起居郎二人從六品上掌
錄天子起居法度天子御正殿則郎居左舍人居
右有命俯陛以聽退而書之季終以授史官貞觀
初以給事中諫議大夫兼知起居注或知起居事
每仗下議政事起居郎一人執筆記錄於前史官
隨之其後復置起居舍人分侍左右秉筆隨宰相
入殿若仗在紫宸內閣則夾香案分立殿下直第
二螭首和墨濡筆皆即坳處時號螭頭高宗臨朝

不決事有所奏惟辭見而已許敬宗李義府為相
奏請多畏人之知也命起居郎舍人對仗承旨仗
下與百官皆出不復聞機務矣長壽中宰相姚璩
議仗下後宰相一人錄軍國政要為時政記月送
史館然率推美讓善事非其實未幾亦罷而起居
郎猶因制敕稍稍筆削以廣國史之闕起居舍人
本記言之職惟入而位於起居郎之次及李林甫
專權又廢太和九年詔入閣日起居郎舍人具紙

筆立螭頭下復貞觀故事有令史三人贊者六人
○中書省起居舍人二人從六品上掌修記言之
史錄制誥德音如記事之制季終以授國史有楷
書手四人典二人

唐會要武宗會昌二年十月中書奏起居注記比
者不逐季撰錄請每季初即納前一季所記與史
館以遲速為殿最從之

謹案唐以起居郎舍人分侍左右執筆記錄記

注官侍班之制實起於此時其季終以所修錄
送史館即如今每歲十二月以

起居注送內閣之例而宰相所錄又名時政記則
如今內閣之有

上諭檔及外紀檔也

五季

薛居正舊五代史周李穀監修國史請命近臣錄
禁中事付史館乃命樞密院直學士就樞密院錄

送史館自此始

謹案五季兩省設官並沿唐制而起居郎舍人之職皆不見於紀傳觀薛史所載今樞密直學士錄時事以送史館則亦未必備官也

宋

文獻通考元豐官制廢翰林侍讀侍講學士不置但為兼官然必侍從以上乃得兼之其秩卑資淺則為說書歲春二月至端午日秋八月至長至日

遇隻日入侍過英閣輪班講讀元祐七年復增學士之號建炎元年詔特差侍從官四員充講讀官遇萬幾之暇令三省取旨就內殿講讀

山堂考索宋太祖召趙孚講周易又召王昭素講易乾卦真宗置侍讀侍講學士擇耆舊以充其選設直廬於秘閣侍讀更直仁宗天聖元年上始御崇政殿召侍講孫奭馮元講論語初詔隻日至是隻日亦詔講讀景祐元年以賈昌朝趙希言王宗

道楊安國並為崇政殿說書日以二人入侍講崇政說書自此始舊講讀官每見先賜坐暫起講復坐仁宗富於春秋乃令儒臣並就御案遂為故事范鎮東齋紀事宋崇政殿西有延義閣南向迎陽門之北有邇英閣東向皆講書所仁宗初御延義每令講論或講讀終篇則宣二府大臣同聽賜飛白書或賜宴其後專御邇英也

吳曾能改齋漫錄王荊公所作賈魏公神道碑云

景祐元年積官至尚書都官員外郎乃始置崇政
殿說書而以公為之然予按傅簡公佳話云太祖
少親戎事性好藝文即位未幾召山人郭無為於
崇政殿講書至今講官所領階銜猶曰崇政殿說
書云據傅簡公所云則崇政殿說書不始於仁宗
景祐元年矣豈中嘗罷之而至是再建耶

謹案經筵之制起於宋凡侍讀侍講學士侍讀
侍講及崇政殿說書皆稱經筵官馬端臨所謂

至清要顯美者是也當時以雙隻日入侍講讀
早晚進講惟遇假故及大寒大暑權行停罷故
經筵即日講並不分設兩官自明於經筵以外
有日講午講諸儀於是經筵日講職名始區而
為二矣今以讀講已為翰林定職故別載入翰
林院篇而崇政殿說書則繫之比表至吳曾以
說書之官起自郭無為考之於史郭無為乃抱
腹山人北漢主劉承鈞召以為相後為劉繼元

所殺其人始終在壯漢並未入宋安得有太祖
召令講書之事真無稽之談不足信也

宋史職官志門下省起居郎一人掌記天子言動
御殿則侍立行幸則從大朝會則與起居舍人對
立於殿下螭首之側凡朝廷命令赦宥禮樂法度
損益因革賞罰勸懲羣臣進對文武臣除授及祭
祀宴享臨幸引見之事四時氣候四方符瑞戶口
增損州縣廢置皆書以授著作官國朝舊置起居

院命三館校理以上修起居注熙寧四年詔諫官
兼修注者因後殿侍立許奏事元豐二年兼修注
王存乞復起居郎舍人之職使得盡聞明天子德
音退而書之神宗亦謂人臣奏對有頗僻讒慝者
若左右有史官書之則無所肆其姦矣然未果行
故事左右史雖日侍立而欲奏事必稟中書俟旨
存因對及之八月迺詔雖不兼諫職許直前奏事
蓋存發之也官制行改修注為郎舍人六年詔左

右史分記言記動元祐元年仍詔不分七年詔過
英閣講讀罷有留身奏事者許侍立紹聖元年中
丞黃履言所奏或干機密難令旁立仍依先朝故
事先是御後殿則左右史分日侍立崇寧三年詔
如前殿之儀更不分日大觀元年詔事有足以勸
善懲惡者雖秩卑亦書之紹興二十八年用起居
郎洪遵言起居郎舍人自今後許依講讀官奏事
隆興元年用起居郎兼侍講胡銓言前殿依後殿

輪左右史侍立○中書省起居舍人一人掌同門
下省起居郎侍立修注官元豐前以起居郎舍人
寄祿而更命他官領其事謂之同修起居注官制
行以郎舍人為職任淳熙十五年羅點自戶部員
外郎為起居舍人避其祖諱乃以為太常少卿兼
侍立修注官其後兩史或闕而用資淺者則降旨
以某人權侍立修注官

玉海淳化五年四月丙戌史官修撰張佖請置起

居院修左右史之職記錄為起居注每月與時政
記同送史館上嘉之乃置院於禁中命梁周翰李
宗諤掌郎舍人事修撰體式檢討故事以聞丁酉
周翰等言今復應有崇德殿長春殿皇帝宣諭之
言侍臣論列之事依舊中書編為時政記月終送
史館其餘百官封拜除改沿革之事並令闕報起
居院以備編錄每月送史館仍命郎舍人分直崇
政殿以記言動別為起居注每月先進御後付史

館從之慶曆三年十一月同修注歐陽修請上殿
臣僚少留殿門俟修注官出面錄聖語又請更不
進本從之至和元年八月二十四日知制誥賈黯
乞修注官入侍邇英閣事有可書隨即記錄二年
三月丁卯令立侍諫官兼修注

文獻通考宋沿唐制起居郎隸門下起居舍人隸
中書號小兩省官

費衮梁谿漫志二史立螭頭舊多服綠者謂之一

點青其職曰記言記動則人主起居之際皆所當侍而遇乘輿行幸未嘗扈從此亦闕文近世始命起居郎起居舍人從駕乃合建官本意

謹案宋以起居郎為左史起居舍人為右史專修記注與講筵官原各為一職然考王應麟稱說書賈昌期以經筵議論纂為通英延義二閣記注孝宗時洪邁等在經筵亦以所得上語及奏對編為祥曦緝熙二殿記注則今記注官之

蕪

日講銜權興於此矣

遼

遼史百官志門下省起居舍人院起居舍人聖宗
開泰五年見起居舍人程翥知起居注耶律迪里

索倫語頭也原作
敢烈今改正

重熙末知起居注起居郎杜防開

泰中為起居郎

金

宇文懋昭大金國志天會十三年改官制記注院
置修起居注

金史百官志記注院修起居注掌記言記動明昌
元年詔母令諫官兼或以左右衛將軍兼貞祐三
年以左右司首領官兼為定制○益政院正大三
年置於內廷以學問該博議論宏遠者數人兼之
日以二人上直備顧問講尚書通鑑貞觀政要名
則經筵實內相也

金史哀宗本紀正大三年七月詔設益政院於內廷以禮部尚書楊雲翼為益政院說書官

謹案遼道宗有令侍臣講論語事則當時亦嘗置進講之官特無經筵之目耳至金初未開講幄正大中始設益政院官令其日侍講讀而說書官以禮部尚書兼之則其職較崇今以尚書侍郎充

經筵講官蓋即其例也

元

陶宗儀輟耕錄天厯初建奎章閣于西宮興聖殿
之西廊文宗復位陞為奎章閣學士院置大學士
五員並知經筵事侍書學士二員承制學士二員
供奉學士二員並兼經筵官幕職置叅書二員典
籤二員並兼經筵叅贊官藝文監太監少監監丞
或有兼經筵官者博士兼經筵叅贊官授經郎兼
經筵譯文官

元史黃潛列傳潛兼經筵官執經進講者三十有二帝嘉其忠數出金織文段賜之

元史額琳沁巴勒列傳

唐古特語額琳沁寶也巴勒威也原作亦憐真班今

改正額琳沁巴勒以御史大夫知經筵事經筵進講必詳必慎故每讀譯文必被嘉納

元史百官志至元六年始置起居注左右補闕掌隨朝省臺院諸司凡奏聞之事悉紀錄之如古左右史十五年改陞給事中兼修起居注左右補闕

改為左右侍議奉御兼修起居注後定置給事中
兼修起居注二員右侍儀奉御同修起居注一員
左侍儀奉御同修起居注一員

孫承澤春明夢餘錄元人經筵儀節悉備如以勲
舊大臣知其事及定期二八月後累朝皆仍其制
謹案元以奎章閣學士院兼經筵官給事中兼
起居注官皆設為定職而勲舊大臣亦間令知
經筵以重其事如額琳沁巴勒以御史大夫兼

領者是也

明

廖道南殿閣詞林記洪武中令儒臣更番入禁中
每日輪一員進講侍直誤者罪之如大學士吳沈
嘗坐進講遲誤被劾永樂以後多渥典自設經筵
後講官不復入直惟令翰林及春坊經局等官相
輪侍班久之選為展書官又自展書乃得充月講
官若日講則用年資深而品秩尊者

續文獻通考英宗正統元年春二月始開經筵命
太師英國公張輔知經筵事少傅兵部尚書兼華
蓋殿大學士楊士奇少傅工部尚書兼謹身殿大
學士楊榮禮部尚書兼學士楊溥同知經筵事詹
事府少詹事兼侍讀學士王直少詹事兼侍講學
士李時勉錢習禮陳循侍讀苗衷侍講高穀修撰
馬愉曹鼐兼經筵官仍賜宴及金幣有差遂為定
制續定經筵儀注每月三日日以逢二為期歲率

以二八月中旬起四十月末旬止用勲臣一人知
經筵事內閣大學士二人同知經筵事六部尚書
左右都御史通政司使大理寺卿及學士等官侍
班翰林院春坊等官及國子監祭酒二員進講二
員展書給事中御史各二員侍儀鴻臚寺錦衣衛
堂上官各一員供事又鳴贊一員贊禮序班四員
舉案侯伯各一人領將軍侍衛

春明夢餘錄文華殿經筵每歲以二八月中旬起四

十月末旬止月三會講日皆逢二進講每兩人一
四書一經講章皆預呈閣臣轉付中書繕錄正副
各二紙隔日進司禮監官奏知先晚於文華殿內
寶座地平之南設金鶴香爐左右各一於左香爐
之東稍南設御案講案各一皆西向案上各置所
講二書以夾講章各壓以金尺一副至期早進近
侍內臣及知經筵官勲臣內閣學士并講官及六
部尚書都御史大理寺卿通政司使鴻臚寺卿錦

衣指揮使及四品以上寫講章官俱繡金緋袍其
展書翰林官與侍儀御史給事中序班鳴贊等官
俱青繡服朝畢駕起御文華殿皆隨之大漢將軍
凡二十名導駕至左順門退易冠帶便服仍各執
金瓜而領將軍或侯或伯者則易金繡蟒衣追越
衆官進左順門皆分班綴行立文華殿外俟傳宣
云進來則將軍先入殿內負東西牆立諸臣陞陞
鴻臚寺官贊入班行禮畢以次分由殿東西門入

重班立指揮則立西一班末稍前御史給事序班
六員分於中門左右向北立序班二人舉御案進
上二人舉講案置中鳴贊唱進講二官各出班立
講案前展書官二員出班對立鳴贊講官並行禮
興東展書官進至地氈膝行詣御案展四書講章講
四書官亦稍前近案展所講書竣展書官復位先
說講某書然後申講講畢掩書稍退後原展書官
仍如儀進掩書復位西展書官與講經官進退俱

如前儀講畢仍並行禮各回班序班各撤案聯置
舊所鴻臚卿中跪奏禮畢上諭官人每喫酒飯各
官跪承旨興以次出丹陛仍行禮乃出左順門宴
以官序惟學士之坐立則序於鴻臚寺卿及四品
以上寫講章官及展書官坐立亦序於四品之下
重職事也又日講官凡四員日輪二員先大學衍
義次貞觀政要二書皆不用講章惟各以黃票書
所起止預進先日內臣設御案於文華殿後穿堂

中以二書並起止置案上至日早朝畢四講官同
閣臣隨駕入至殿內授內臣以來日起止蒞名乃
入穿堂內行禮分班北向前後立東班當講者詣
御案前內侍授牙籤右手執之且指且講書則向
上初展後掩皆屬內侍講畢還籤復位西班當講
者乃進講悉如東儀講畢上諭先生喫酒飯皆跪
承旨行禮禮畢前後皆一拜三叩頭出宴於文華
門外西廡禁中謂之小經筵亦謂之小講

明史職官志起居注甲辰年置吳元年定秩正五品洪武四年改正七品六年陞從六品九年定起居注二人後革十四年復置秩從七品尋罷至萬厯間命翰林院官兼攝之已後罷

謹案自魏晉以後歷代皆有起居之任至明初暫置即罷遂不復設翰林職掌雖有記注起居編纂六曹章奏之文僅屬虛名未嘗撰輯神宗時閣臣始議開史局以東西十館密通朝堂紀

述為便乃以東館近上四所令史臣分直其中
一起居二吏戶三禮兵四刑工日輪日講官一
員專記起居兼錄聖諭詔勅冊文其六曹章奏
則選史官中年深而文學素優者六人分纂因
定常朝御門日記注起居官及史官侍班之制
日講官繫起居注銜蓋自此始然不久仍復停
輟故終明之世起居之官不備以致史職曠廢
王鏊震澤長語所謂前代左右史皆親見在廷

君臣言動而書之成化以來人君不復與臣下接朝事亦無可紀凡修史則但取諸司奏牘分派諸人以年月編次雜合成之後世將何所取信者是也我

朝復設

起居注館以翰詹諸臣兼充執簡簪臺敬謹紀載年經月緯歲有成編視唐宋之時政記日錄而更昭核實矣

又案經筵之禮始於宋代所以講明正學闡繹
聖文歷代相因咸稱鉅典至明而儀節尤為詳
備然當時人主習於宴安怠惰往往臨朝傳免
即有勤於聽講者亦不過以文具相視未嘗有
所辨論發明黃瑜雙槐歲抄載明景帝每講畢
命中官布錢於地令講官拾之以為恩典高穀
年老俯伏不便恒莫能得一他講官拾以遺之
是以講學論道之地而恣意媒瀆實乖典則逮

熹宗之世而顧秉謙等於經筵講畢袖出市刊
遼東傳以構陷熊廷弼遂借書幃令典以曲肆
其傾害之機謀益非念陳典謨之本意矣

國家敦崇實學久道化成

皇上稽古尊經歲

莅講幄

親製御論發揮精蘊無不澈天人之微旨貫理道之
真源諸臣肅跼敬聆仰見

覺世牖民之至意心悅誠服莫可名言統備
君師實三代以後所莫能景企於萬一也



欽定歷代職官表卷二十四